

## Oraziun per colurs ella veta

Segner, en nossa veta dat ei bia grisch el mintgadi. Nus rughein tei per colurs ella veta, sinaquei che nies viver possi reussir meglier a nus ed a nos concarstgauns.

### Segner,

Dai a nus bia dil **mellen** dalla glisch per surportar il stgir da nossa via.

Dai a nus igl **oransch** che fa cauld encunter tut il freid da nies temps.

Dai a nus il **vert** dalla speranza encunter resignaziun e nunsenn ella veta.

Dai a nus nus il **tgietschen** dalla carezia che nus savein puspei reparter ella.

Dai a nus il **blau** dalla cardientscha per anflar valurs e bunas finamiras.

Dai a nus il **violet** dalla reconciliaziun per perdunar e far novas entschattas.

Dai a nus il **nèr** dalla mort per seregurdar dil prender cumiau.

Dai a nus igl **alv** che lai entscheiver tut niev. Lu savein nus esser aviarts e prompts per la necessitad dil temps.

Dai a nus il **brin** dalla tiara per haver statteivladad e perseveronza.

Dai a nus dil prezios **aur** per veser il scazi egl èr.

Dai a nus in tec da **tuttas colurs**, pertgei la veta en colurs sesplaga meglier e pli lev.

**Segner**, muossa a nus mintgaton in **artg** sinaquei che nus saveien:

TI eis sur da nus, protegias e benedeschas nus.

Pertgei la legria en TEI, bien DIU, ei nossa forza.

---

### Nos novs ministrants:

**A Laax** sorprendan ils suandonts affons quei survetsch:

Barucic Naomi e Cavigelli Julian

**A Falera** surveschan el survetsch divin:

Bärtsch Anna

Bearth Toni

Cabalzar Fabienne

Caduff Yannick

Cajochen Nino

Casutt Fabia

Suter Natalina



Dieus paghi per vies engaschi e bia satisfacziun e plascher el survetsch dalla pleiv.

## Informaziuns per Laax

Communiun dils malsauns: Mesjamna, ils 15- 10 - 08  
**suentermiezdi**

### Fiasta digl sogn Batten

Dumengia, ils 12 d'october allas 11.15h retscheiva

**Mattia Gian Andrea Cavelti**, feagl da Riccarda Cavelti e Sacha Borzatta il sogn sacrament dil Batten.

Dumengia, ils 19 d'october allas 10.30h a s. Rumetg retscheiva **Ania Sophia Tuor**, feaglia da Rest Giusep e Petra Tuor-Cahenzli il sogn sacrament dil Batten. A Mattia ed Ania Sophia giavischein nus satisfacziun e ventira en lur veta sco cristifideivels.

### PERDANONZA

La fiasta da Perdanonza, ils 19 d'october, detti a nus danovamein impuls e plascher da saver viver en ina cuminoza cristiana cun tut ses usits. La fiasta detti forza da viver cun perschasiun la veta d'in cristifideivel.

In cordial engraziamnet a tuts parochians ch'embelleschan la fiasta cun ornar la baselgia, cun cant e parada e cun la partizipaziun al survetsch divin ed alla procession.

Per nies parochian, organist, dirigent e cumponist Gion Balezer organischa la pleiv a caschun da siu natalezi da 70 onns ina sentupada cun in Apéro suenter la procession la dumengia da perdanonza.

L'entira pleiv ei cordialmein envidada ad in VIVA cun Gion Balzer ed aschia dar in segn d'engraziament ad el per tonta lavur prestada - dabia era el zuppau.

### Dumengia dallas Missiuns.

Mintg' onn vegnin nus el temps da nossas perdanonzas era fatgs attents che nus essan baselgia mundiala. Nus lein buc emblidar che nus essan era responsabels per nos frars e nossas soras che vivan en paupras tiaras ed en autras relaziuns che nus. Noss'unfrenda va uonn en favur dallas missiuns ella Columbia. Nus seregurdein era dils pievels dil mund ella cadeina d'Oraziun che nus havein previu tier il survetsch ils 21 d'october allas 19.00h.

**Oraziun da cuminoza ha gronda forza.**

## Informaziuns per Falera

Communiun dils malsauns: Venderdis, 03- 10-08 **suentermiezdi**  
Gievgia, 16- 10-08 **suentermiezdi**

### Gratulaziuns

A nos giubilar che festiveschan lur anniversari rodund lein nus gratular da cor.

Igl 1. d'october ei la fiasta dad **80 onns per dunna Margretha Arpagaus-Cavelti**. **Ils 2 d'october festivescha Gieri Mathias Cathomen-Thom siu 80avel anniversari**. In sulegliv ed emperneivel di da fiasta a Vus e Vossas famiglias.

### Nozzas d'ordeifer a s. Rumetg

Sonda, ils 04 d'october allas 15.00h Johanna e Vital Wohgensinder-Steinle. Nus gratulein als nozzadurs e giavischein ventira e buna convivenza ella veta da lètg.

### Sogn Batten

Sonda, ils 18 d'october retscheivan ils affons **Nguyen Ngoc Lan, Nguyen Ngoc Bich e Nguyen Minh Khang** ils sogn sacrament dil batten. La famiglia ha enconuschents a Falera e less battegiar lur affons en quei liug. La famiglia viva a Küssnacht al pei dil cuolm Rigi.

### Geniturs e parochians uran per ils affons

Entginas persunas da tuttas vegliadetgnas han dau suatientscha agl invit d'urar per affons e giuvenils ils 7 da settember alls 19.30h. Era el meins d'october havein nus previu ina sera d'oraziun cun quei intent. L'oraziun da cuminoza ei per tuts parochians, per tuttas generaziuns. Igl ei buca manegiau che mo quellas persunas prendan part che han quitaus e fastedis cun ils surnumnai. Meinsvart dat ei situaziuns nua che nus sentin e duvrein pli fetg e pli ferm il sustegn in da l'auter. Buca mo en grevas uras, mobein era en buns temps lein nus ir en fidonza tier Diu e rugar per siu sustegn e rinforz. Vegni pia e rinforzei in l'auter ell'oraziun.

### Dumengia dallas Missiuns

Nus havein previu in survetsch divin cun igl intent dalla dumengia dalla missun mundiala. Quel celebrein nus sonda, ils 18 d'october allas 19.30. L'unfrenda dalla dumengia va en favur dalla missiun ella Columbia.